

## PELANJUTAN PENUTUPAN SEMENTARA MASJID, SURAU DAN BALAI IBADAT SELURUH NEGARA BRUNEI DARUSSALAM

1. Kementerian Hal Ehwal Ugama ingin memaklumkan bahawa Majlis Ugama Islam Brunei telah bersidang pada Hari Sabtu, 03hb Sya'ban 1441 Hijrah bersamaan 28hb Mac 2020 Masehi untuk menilai perkembangan penularan Wabak COVID-19 di negara ini bagi membuat keputusan samada untuk membuka atau melanjutkan lagi penutupan sementara masjid-masjid, surau-sarau dan balai-balai ibadat seluruh negara. Hasil persidangan tersebut telah disembahkan ke hadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam dan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah memperkenannya.
2. Maka pada menjunjung titah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam, Majlis Ugama Islam Brunei memaklumkan bahawa penutupan sementara masjid-masjid, surau-sarau dan balai-balai ibadat seluruh negara yang berakhir pada hari Isnin, 06hb Sya'ban 1441 Hijrah bersamaan 30hb Mac 2020 masehi adalah dilanjutkan lagi selama satu (01) minggu mulai hari Selasa, 06 Sya'ban 1441 Hijrah bersamaan 31hb Mac 2020 Masehi sehingga pada hari Isnin, 13hb Sya'ban 1441 Hijrah bersamaan 06hb April 2020 Masehi kerana masih ada bahaya penularannya sepertimana nasihat Kementerian Kesihatan dan Fatwa Mufti Kerajaan bilangan 02/2020 mengenai kewajipan menghindari daripada bahaya. Sebelum tamat tempoh penutupan ini, Majlis Ugama Islam Brunei akan menilai lagi perkembangan sekitar penularan wabak ini di negara kita.
3. Dalam kesempatan ini, sukacita dimaklumkan bahawa langkah-langkah pembersihan seluruh masjid, surau dan balai ibadat secara semburan nyahkuman telahpun selesai dilaksanakan. Sementara langkah untuk menjaga kebersihan masjid secara berterusan akan dilaksanakan berpandukan nasihat Kementerian Kesihatan bagi membolehkan masjid digunakan dengan selamat seperti biasa setelah dibuka nanti. Walau bagaimanapun penggunaan semula masjid-masjid adalah masih tertakluk kepada keadaan Wabak COVID-19 dan perkembangannya di negara ini.

4. Berhubung kegiatan keugamaan pada malam Nisfu Sya'ban pada setiap tahun, di mana pada tahun ini malam Nisfu Sya'ban adalah jatuh pada hari Rabu, 15hb Sya'ban 1441 Hijrah bersamaan 08hb April 2020 Masehi, yang mana mengikut tarikh tersebut perkara ini tidak termasuk dalam tempoh penutupan sementara masjid pada masa ini tetapi In Sha Allah perkara ini akan dimaklumkan mengenainya selepas penilaian perkembangan Wabak COVID-19 yang akan datang nanti.
5. Sementara masjid-masjid, surau-surau dan balai-balai ibadat ditutup, Kementerian Hal Ehwal Ugama dengan kerjasama Radio Televisyen Brunei akan menyiarkan rancangan-rancangan keugamaan di radio dan televisyen pada waktu tengahari hari Jumaat dengan pengisiannya bacaan-bacaan zikir dan tazkirah yang juga boleh diikuti membacanya oleh orang ramai.
6. Kementerian Hal Ehwal Ugama ingin mengulangi seruan kepada orang ramai agar dapat menggunakan peluang pada masa ini untuk terus meningkatkan amal ibadat dan kebajikan bersama keluarga di rumah masing-masing. Dalam keadaan kehidupan seharian kita terjejas pada masa ini akibat Wabak COVID-19, hendaklah kita terus mematuhi arahan-arahan daripada pihak-pihak berkuasa terutama sekali Kementerian Kesihatan sambil meningkatkan amal ibadat dan kebajikan serta beristighfar dengan berdoa memohon ke hadrat Allah Subhanahu wa Ta'ala melimpahkan rahmat dan balas kasihan-Nya bagi melindungi kita sekalian dari bala bencana khususnya dalam keadaan sekarang ini Wabak COVID-19. Dan jangan lupa bahawa kita ini adalah umat Islam yang beriman, kita diajarkan untuk menerima apa jua bencana dan musibah sebagai ujian dan cubaan daripada Allah Subhanahu Wa Ta'ala yang mana cubaan dan ujian ini adalah untuk melihat sejauhmana ikhtiar dan usaha kita mengatasinya. Ini bertepatan dengan ayat 02 dari Surah al-Ankabut :

" أَحْسِبَ النَّاسُ أَنْ يُتْرَكُوا أَنْ يَقُولُوا ءَامَنَّا وَهُمْ لَا يُفْتَنُونَ { ٢ } "

Mafhumnya: " Adakah manusia itu menyangka bahawa mereka akan dibiarkan dengan (hanya) berkata: 'Kami telah beriman,' sedang mereka tidak diuji? [02] "

Sebagai umat Islam yang beriman, kita hendaklah sentiasa bersabar dan jangan lalai daripada berikhtiar dan berdoa. Dalam mengharungi suka duka kehidupan, marilah kita berpandukan firman Allah ayat 155-156 dalam Surah al-Baqarah :

" وَلَنَبْلُوَنَّكُمْ بِشَيْءٍ مِّنَ الْخَوْفِ وَالْجُوعِ وَنَقْصٍ مِّنَ الْأَمْوَالِ وَالْأَنْفُسِ وَالثَّمَرَاتِ  
وَبَشِّرِ الصَّابِرِينَ { ١٥٥ } الَّذِينَ إِذَا أَصَابَتْهُمُ مُصِيبَةٌ قَالُوا إِنَّا لِلَّهِ وَإِنَّا إِلَيْهِ رَاجِعُونَ  
{ ١٥٦ } "

Mafhumnya: " Dan sesungguhnya Kami pasti akan menguji kamu dengan sedikit perasaan takut dan kelaparan dan kekurangan harta benda dan jiwa dan buah-buahan (kerana Kami hendak melihat sama ada kamu sabar atau tidak atas ujian itu). Dan sampaikanlah berita gembira kepada orang-orang yang sabar. [ayat:155] Iaitu orang-orang yang apabila ditimpa oleh sesuatu musibah mereka berkata: "إِنَّا لِلَّهِ وَإِنَّا إِلَيْهِ رَاجِعُونَ" (Sesungguhnya Kami adalah kepunyaan Allah dan kepada-Nya jualah kami kembali). [Ayat:156] "

-TAMAT-

Rujukan: KHEU/BPA/PR/MAC/2020

Tarikh: 05hb Sya'ban 1441H bersamaan 30 Mac 2020M